

每週經課朗誦經文(巴克禮漢羅/教羅)2013/09/01

共同經課 - 1 耶利米書二章四節~十三節

4 雅各 ê 家 ah, 以色列家 ê tàk 房頭 ah, lín tiòh 聽耶和華 ê 話。5 耶和華 án-ni 講, Lín ê 列祖看我有甚麼不義, 竟然離開我遠遠, 去 thàn hiah-ê 虛假 ê, 來做虛假 ê ah? 6 In 亦無講, hit-ê chhoā 咱出埃及地 ê 耶和華 tī toh-lòh? 伊是 chhoā 咱經過曠野、沙漠, kap 深坑 ê 所在, 炕旱死蔭 ê 地; 無人經過, 無人 khiā 起 ê 境界。7 我 chhoā lín 入肥 ê 地, hō lín 食 hit 中間 ê 果子 kap 好物; 總是 lín 入來了, 就 phah lâ-sâm 我 ê 地; hō 我 ê 產業成做可惡 ê。8 祭司 lóng 無講, 耶和華 tī toh-lòh leh? 講解律法 ê m̄-bat 我, 官長悖謬我, 先知靠 Pa-lék 來讖語, koh thàn 無利益 ê 事。9 耶和華講, 我因為 án-ni beh kap lín 爭辯; 亦 beh kap lín ê kiáⁿ-kiáⁿ 孫孫爭辯。10 Lín tiòh 過去 Ki-thê chiah-ê 海嶼來觀看, 差人去 Ki-tát 留心查考; 看 bat 有 chit 號事 á 無。11 Kiám 有一國改換 in ê 上帝 mah? 其實 hiah-ê m̄ 是上帝; 總是我 ê 百姓將 in ê 榮光來換 hit-ê 無利益 ê。12 Chiah-ê 天 ah, tiòh 因為 chit-ê 來 gông-ngiáh, 極其驚惶, 盡在冷靜; 這是耶和華講 ê。13 因為我 ê 百姓做兩項 pháiⁿ-tāi, 就是我做活水 ê 源頭, in 離開我; koh 為家已開池, 是破裂 boē 貯水 ê 池。

共同經課 - 2 詩篇八十一篇一節, 十節~十六節

1 A-sat ê 詩; 交 hō 樂官; 用 Ka-ték ê 調。1) 上帝是阮 ê 氣力, lín tiòh 大聲 o-ló 伊; Tiòh 出歡喜 ê 聲, o-ló 雅各 ê 上帝。10 我是耶和華, 你 ê 上帝, Bat chhoā 你 tùi 埃及地上來; Tiòh 大開你 ê 嘴, 我就充滿伊。11 總是我 ê 百姓 m̄ 聽我 ê 聲; 以色列全然 m̄ chhiū-chhái 我。12 我就 chhut-chai⁷in, 照 in ê 心 ê 固執; Hō in 照 in 家已 ê 計謀去行。13 願我 ê 百姓肯聽我; 以色列肯行我 ê 路。14 我就緊緊制壓 in ê 仇讎; Oát-tng 我 ê 手, 攻擊 in ê 對敵。15 怨恨耶和華 ê 人, beh 來投降伊, 總是 in ê 時代 beh 久長 tī-teh。16 伊亦 beh 用好 ê 麥 hō in 食; 我用 tùi 石磬出 ê 蜜, hō in 食飽。

共同經課 - 3 希伯來書十三章一節~八節, 十五節~十六節

1 兄弟 ê 相疼 tiòh 久長。2 莫得 boē 記得接待人客; 因為 tùi án-ni, bat 有接待 tiòh 天使, 亦 m̄ 知 ê。3 Tiòh siàu 念 chiah-ê 受關 ê, 親像 kap in 相同關; siàu 念受暴虐 ê, 是 lín 亦有身軀。4 婚姻人人 tiòh 尊重, 床無 lâ-sâm; 因為私通行淫 ê 人, 上帝 beh 審判伊。5 心志 m̄-thang 貪財; 掠所有 ê 做夠額; 因為上帝有講, 我決斷無放 sak 你, 決斷無離開你。6 所以咱 thang 好膽講, 主就是幫贊我 ê, 我無 beh 驚惶, 人 beh 啥法得我 ta-oâ? 7 前引 chhoā lín, 用上帝 ê 道理傳 hō lín ê 人, lín tiòh siàu 念 in; 看 in 行做 ê 結局, 來學 in ê 信。8 耶穌基督昨日、今 á 日同一樣, 直到代代。15 所以 tiòh 對耶穌常常用 o-ló 做祭, 獻 hō 上帝; 這就是承認主名 ê 嘴唇所結 ê 果子。16 獨獨行好, kap 相供給, lín m̄-thang boē 記得, 因為 chit 號 ê 祭是上帝所歡喜 ê。

共同經課 - 4 路加福音十四章一節, 七節~十四節

1 安歇日耶穌入一個法利賽頭人 ê 厝, beh 食; in teh 當等伊 7 耶穌看 hiah-ê 人客揀大位, 就設譬喻對 in 講, 8 Lín Hō 人請去赴婚姻 ê 筵桌, 莫得坐大位, 驚了比你 khah 尊貴 ê 也 hō 伊請, 就請你 kap 請伊 ê 來 kā 你講, 讓位 hō chit 人; 9 你就見笑, 退去坐 tī 尾位。10 獨獨 hō 人請 ê 時 tiòh 去坐尾位, 就請你 ê 來 kā 你講, 朋友 ah, 坐起來; hit 時你 tī 同桌 ê 人 ê 面前就有體面。11 因為見若自高 ê beh hō 伊卑微; 家已卑微 ê beh 高升伊。12 耶穌也 kā 請伊 ê 人講, 你辦日晝頓 á 是 ê-hng 頓, m̄-thang 請你 ê 朋友, á 是兄弟, á 是親戚, á 是好額 ê 厝邊, 驚了 in 倒請你, 你就受報答。13 但是你辦筵桌 ê 時, tiòh 請 sòng-hiong ê、破相 ê、跛腳 ê、chhiⁿ-mî ê; 你就有福氣; 14 因為 in 無 thang 報答你; 就 tī 義人 koh 活 ê 時你 beh 得 tiòh 報答。